

Celebracion Dia Internacional di Jazz awe cu concierto gratis den aire liber

ORANJESTAD- Desde aña 2002, e famoso musico Arubiano, Carlos Bislip ta organisa den cuadro di e luna Internacional di Jazz, un evento pa conscientisa riba e musica, su origen pero tambe enfocando riba tur e musiconan cu ta toca Jazz na Aruba y nan colaboracion na e genero di e musica aki. Na aña 2002 Smithsonian Institute a declara e luna di April, mundialmente como luna Internacional di Jazz.

Na april 2006, Carlos Bislip a wordo introduci na JAM (Jazz Appreciation Month) durante un conferencia internacional di jazz educators y a hiba e idea pa Aruba, organisando asina JAM localmente. Na aña 2011, Unesco a proclama 30 di April, como Dia Internacional di Jazz y aña pasa Bislip a wordo acerca dor di Unesco Aruba pa organisa conhuntamente den cuadro di e fecha aki un celebracion cu artistanan di Aruba. Den cuadro di esaki, a dicidi di duna un reconocimiento na Eddy Samson pa su elocuente experticio y añanan dedica na e musica di Jazz.

Minister Otmar Oduber a duna su sosten na e proyecto

aki y tanto Departamento di Cultura como Aruba Tourism Authority conhuntamente ta brinda nan experticio na Carlos Bislip pa organisa dia Internacional di Jazz y asina duna nos bishitantenan como tambe e local amantenan di Jazz e oportunidad pa disfruta di un concierto gratis den aire liber, cual e aña aki ta na Renaissance Market Place.

Pa e concierto aki, Carlos Bislip a acerca Leonora Helm di Berklee College of Music. Actualmente Helm ta duna les na un vocal Jazz Group di Aruba via skype y como tal e grupo lo actua durante e concierto. Ademas di esaki, el a biaha bin Aruba cu un grupo di tres cantante cu ta haciendo nan masters degree awo den jazz vocals for di North Carolina Center University cual tambe lo duna nan presentacion diahuebs awo.

“Esaki ta prome aña cu mi ta busca ayudo for di exterior, semper mi a enfoca riba nos talentonan local, studiantenan di musica, pero e aña aki nos ta bay den un otro nivel y pone e enfoca riba enseñansa”, Carlos Bislip ta splica.

E celebracion di dia Internacional di Jazz ta inicia

diahuebs awo dia 30 di april pa 6’or di atardi na Renaissance Market Place, riba e stage dilanti Cafe The Plaza. E celebracion ta completamente gratis y lo consisti di un grupo di muchanan di muziekschool sigui pa e “Cross Heart Project” cu ta dos alumno cu ta preparando pa sigui nan estudio den exterior.

E celebracion lo conta tambe cu Nel Scholten y Eduardo Maya y su Tropical Jazz, sigui pa The Vocal Jazz Ensemble cu ta e seis vocalistanan di e Jazz Vocal Group y ta termina cu Leonora Helm cu su presentacion. Durante e celebracion lo duna reconocimiento na un musico Arubiano.

Mester remarca cu desde cu Carlos Bislip a inicia cu e proyecto aki, varios alumno a bay studia den exterior, entre otro Sergio Janssen, David Bernabela, Jamal Baptist, Michael Bremono, Jose Croeze y Kyle Winklaar. Algun a caba nan Bachelor y awo ta haciendo nan masters degree y nan tambe lo forma parti di e celebracion aki. Tur esaki den cuadro di e celebracion di dia Internacional di Jazz dia 30 di April, dunando honor na nos musiconan y nos artistanan local. □